

Bihar hasita, 31 ikastaro eskainiko dira Udako Euskal Unibertsitatean, Iruñean

Baleren Bakaikoak emango du sarrera hitzaldia, euroaren eraginari buruz


Miren Iriarte / Iruñea

Bihar hasiko da Udako Euskal Unibertsitatearen 27. ekitaldia, Iruñeko Larraona ikastegian. Aurtengoan berrikuntza ugari izanen dira, eta eskola teorikoekin batera klase praktikoak, txangoak eta saio osagarriak antolatu dituzte. Antolatzaileek inoiz baino ikasle gehiago espero dute aurtun.

UDAKO EUSKAL UNIBERTSITATEAK (UEU) bihar zabalduko ditu ateak. Miarrizten iragan uztailearen 5etik 9ra bitartean izan ziren ikastaroak, eta orain uztailearen 19tik 30era Iruñean izanen dira. Aurtengoa ikastaroak egiten diren 27. aldia da, eta berrikuntza eta ikasgai berri askorekin dator. Hiru sailetan banaturik daude: Artea eta Komunikazioa, Giza- eta Gizarte-zientziak eta Zientziak. Hogeita hamaika ikastaro ezberdin izanen dira Iturrama institutuan.

Eskaintza zabala

Iazkoekin alderatuz, ikastaro berri anitz izanen dira aurtun. Horien artean, giza- eta gizarte-zientzien arloan, literatura eta kazetaritza ikastaroak izanen dira —iaz ez ziren egin—. Gainera, literatura ikastaroan Ramon Saizarbitoriak eta Arantxa Urretabizkaiek hitzaldia emanen dute, uztailearen 20an eta 22an hurrenez hurren. Giza- eta gizarte-zientzien sailean, halaber, filosofia, historia eta sexologia ikastaroak izanen dira besteak beste, eta Julio Ibarra kazetaria eta Antton Olariaga marrazkigileak egonen dira besteren artean.



ARTXIBOKOA

Euroa Euskal Herriko ekonomian hitzaldiarekin zabalduko ditu Baleren Bakaikoak bihar UEUren Iruñeko ikastaroak. 1983tik 1987ra UEUko zuzendaria izana da Bakaikoa.

Zuzenbideko ikastaroan Euskal Herriko lurraldetasunaren inguruan ariko dira, eta uztailearen 27an Nafarroa Garaia eta Nafarroa Beherearen arteko mugara txangoa egingen dute.

Arte eta komunikazioen sailean lau ikastaro izanen dira: antzerkilaritza, arkitektura, bertsolaritza eta musikaren ingurukoak. Zientzietan, berriz, sei ikastaro izanen dira; informatikako ikastaroan Interneteko programazio hizkuntzei eta aktualitatezko beste zenbait gaiari buruz mintzatuko dira. Kimikako ikastaroetara joaten direnek gauza arrunten kimika ezagutzeko aukera izanen dute. Halaber, uztailearen 20an ardo dastaketa egingen dute kimikako ikasleek.

Natur zientzietako ikasle eta irakasleek irtenaldi bat egingen dute Aralar mendikatera.

Hasierako ekitaldia

UEUko 27. ikastaroei bertako zuzendari Mikel Aizpuruk emanen die hasiera bihar, eguerdiko hamabietan, Iruñeko Larraona ikastetxeko areto nagusian. Ondoren, Baleren Bakaikoak sarrerako hitzaldia egingen du, *Euroa Euskal Herriko ekonomian* gaiaren inguruan. Sailetako eskolak arratsaldean hasiko dira, eta Iturrama institutuan izanen dira denak.

Ohikoa denez, ikasleek Larraona ikastetxean egoitza eta otorduak izateko aukera dute aurtun ere.

Era askotako saio osagarriak

■ UEUk Iruñean antolatu ikastaroen osagarri, hainbat ekitaldi berezi prestatu dituzte. Saio osagarriak bihar arratsaldeko zazpietan abiatuko dira: *Dominique Garat-en euskal errepublika gogoan* eta *Garaten eragina Hego Euskal Herrian* hitzaldiak eta, ondoren, Mundiñano anaiekin erromeria izanen da. Biharamunean, herrien eskubideei buruz mintzatuko dira Joseba Tobar eta Xabier Galardi, eta, ondoren, poesia erreztaldia izanen da. Asteazkenean, euskal emakume sortzaileak izanen dira mahai-inguruaren ardatz, eta, ondoren, *Xalbadorren antologia* aurkeztuko du Xabier Amurizak. Ostegunean, bozketa elektronikoaren alde onak eta txarrak aztertuko ditu Mikel Aramendik eta, ondoren, kontzertua.

Hurrengo astean unibertsitate telematikoa, euskal film laburrak eta Inkak eta Jugoslavia izango dira ekintza osagarrietako gaiak.